

MAFUTAGA FAAFOUINA FAIFEAU & A'OA'O TAUSINUU MALUA, AUKUSO 2016

Mataupu Silisili o le Faamoemoe: O le Valaauina i le Galuega o le Talalelei
[A Theology of Hope: Our Calling in the Ministry]

Faatomuaga

E le o toe fesiligia lava le alia'e mai pea o le tele o faafitauli¹ i lenei vaitau, e le gata i totonu o le lotoifale o le Ekalesia, ae faapea foi i totonu o nuu ma afioaga. O faafitauli ogaoga ua tutupu mai, e luitauina ai le ola faale-faatuatua o le tagata kerisiano moni, ma o le ala lea ua manatu ai, e ala i lenei taumafaiga, sei toe asia lava le tulaga o le "faamoemoe" o le Ekalesia, ae a le galuega o le Talalelei ua tuulima mai e Keriso mo i tatou, mo nei ma a taeao. E leai se atoatoa o i le auauna, ae talitonu le taofi, o lenei taumafaiga vaivai, ua na o se faatupu manatu mo i tatou le aufaigaluega tofofi, ina ia toe tagatagai pea ma tulimatai le misiona a le ekalesia e ala i le faamoemoe ua valaauina iai lo outou soifua galulue ma so matou ola vaivai, ao feagai ai pea i tatou ma luitau o le Talalelei.

Ua fia faaaogaina le manatu autu o le aso lenei e fai ma taiala o ni mafauauga faale-agaga, ma ua ou toe faaupuina e faapea:

Ua fa'a'aupegaina oe, ma a'u, mo le **faamoemoe** - [*You and I are equipped for a purpose*: Tusi Faitau: Salamo 57]

Ua manatu le faipepa, o le a tulimatai pea le uiga o le 'faamoemoe' e pei ona iai i le manatu autu, ma e 2 ni vaega ua vaevaeina iai se taumafaiga, ina ia saga faalatele ai le mataupu ua filifilia, ma le faamoemoe ina ia saga fa'apopoa ai pea le oa ma le tamaoaiga o le mataupu silisili o lo'o faasoa atu e le aufaigaluega galulue, ao feagai ma le feau o le Talalelei.

1. O le a muai talanoaina ni motugaafa mai se tasi o tusitala iloga o le mataupu silisili o le faamoemoe, [A Theology of Hope] o Jurgen Moltmann, e faatatau lava i le uiga loloto ma le taua o le 'faamoemoe' mo so'o se tagata kerisiano
2. O le a auiliili foi nisi o vaega o le molimau a Mataio, ao ia faailoa mai nisi o faafitauli ma lu'itau o le vaitau tau amata o le tuufaatasia o le mafutaga a le au kerisiano. O le mafutaga lenei, e manatu nisi, o se faapotopotoga o tagata sa ofoina mai e i latou latou lava (**voluntary association**), ina ia molimau faatasi i le feau o le Faaolataga.

¹ Ua le toe na lava ma le laina le tulai mai o mataupu ua aafia ai le igoa o le Ekalesia. E le o mapu foi le tele o faafitauli e tutupu i totonu o aulotu, ua aafia ai le nofo lelei, e le gata o tagata lotu, ae faapea foi i le aufaigaluega. E le taumate foi le ogaoga o aafiaga e tutupu i lo tatou lotoifale ona o sauaga i totonu o aiga, ma le faatupulaia pea o le pule i le ola, ma isi faalavelave tuga.

Jurgen Moltmann [1926-] ma le Mataupu Silisili o le Faamoemoe²

O le gasologa o le olaga o lo’o outou soifua ma o’u ola ai, e fesouaina pea e puapuaga ma faigata. Fai mai a Moltmann, o luitau o le soifuaga e ogaoga i nisi o taimi, ae o se faamanatu foi mo i taua, e le sologa lelei pea aso uma o le ola nei. E le gata i lea, ae o le faatauva’a o le tagata, e ao ai lava ona saili i le mafanafana o le Atua i ona mafatiaga. O mafaufauga ia o Moltmann na muai totogo ae i totonu o pa sima o le falepuipui i le taimi o le Taua Lona lua o le Lalolagi. O se vaitaimi aupito sili ona faigata mo ia, ona ua agai foi ona pisia ona lagona i mafaufauga o loo aliae pea i nei ona po, pe a tutupu pefea i le ola – *O fea ea o iai le Atua?* I le ma lea, e masani foi ona leotele le iuleo, pe o le mea ea, “*E manao, pe faataga (allow) e le Atua ona tutupu pefea i le tagata, ma oo ai i se tulaga ua matua sauaina lava, i le tino, mafaufau ma le agaga?* I le ogatotonu o le luluti o tiga o fitafita o le taua sa lagonaina, ma molimauina e Moltmann, na faaosofia ai lagona, ma ia tuufaatasia ai lona ni mafaufauga faale-mataupu silisili, e pei ona iai le tusi ua faaulutalaina e faapea, “*O le Mataupu Silisili o le Faamoemoe – A Theology of Hope*”

I le mnanatu o Moltmann, o le mataupu e faatatau i le Atua ma le ola sauaina o le tagata, o se tasi lea o faafitauli e feagai pea ma so’o se kerisiano. O le Atua foi lea tatou te faitau ma malamalama ai mai le Tusi Paia, e aafia foi pe a oo ina lutia le tagata i tiga ma faigata o le ola nei. Ona iai lea o se manatu o Moltmann e faapea, e ao lava ona tatou talanoa ma fefaasoa’i i le ogaoga o faafiauli e tulai mai i soo se tagata ua mafatia. I le ma lea, ua alagataua lava ona faailoa le leai o se amiotonu (injustice), e le gata o le fevataua’i o Malo, ma le ogaoga o le mativa (poverty) e afua mai ona o taua a Malo tetele o le lalolagi, ae faapea foi i mafatiaga e feagai ma matua pe afai e aafia se tasi o le fanau i le kanesa, o le oso faafuasei o le stroke ae lei mafaufauina, o le pule i le ola (tulou), o faiga faailoga lanu/tagata, ma isi faalavelave tuga e tutupu pea i aso uma.

O luitau nei ua manatu foi Moltmann, e o gatasi lava ma le lagona o le tusiesea (isolation) ma lo tatou manatu, e peiseai ua tuulafoaiina i taua e le Atua, (sense of alienation from God), ona avea lava lea ma ala e faatupu tiga ai i le mafaufau o se ua aafia. Ona o lea le lagona le mautonu i le tagata ua afaina, i le tino, mafaufau ma le agaga, na fausia ai e Moltmann se tasi o manatu ua ogatotonu nei i lana *Mataupu Silisili o le Faamoemoe* e faapea, o le tagi ma le faatoga a le tagata mafatia, ua o se tagi lava a se ua moomia se e papa’i atu iai, ma mafuta atu iai (*our cry to God is a cry of longing*). Ae a oo foi ina maligi loimata ona o tiga, o le

² O mataupu ua talanoaina iinei, o lo faaaogaina ai tusitusiga mai tusi e lua: **Jurgen Moltmann, *A Theology of Hope: On the Ground and Implications of a Christian Eschatology*** (London: SCM Press Ltd), 1965, ma le **Jurgen Moltmann, *The Trinity and the Kingdom: The Doctrine of God*** (Minneapolis: Fortress Press), 1993, faatasi ai ma nisi o tusiga ua faamauiina i nisi o vaega o le pepa. O Moltmann o se tagatanuu o le malo o Siamani, ma o ia o se tagata ua lauiloa i tusitusiga ma suesuega i Mataupu Silisili. Sa ave faatagata-o-tauaina, ao avea ma fitafita Siamani, ma tuuina i totonu o se falepuipui i Belgium i le 1945. O le nofoaga lea na muai feiloai ai i tagata kerisiano, ma maua ai le avanoa e faitau ai i tusi o le Feagaiga Fou faapea le Salamo. E lauiloa i se tasi o ana molimau e faapea, “*Ou te lei maua Keriso, ae o Keriso na ia maua a’u - I didn’t find Christ, he found me.*”

faamoemoe e ao ona tulimata'i pea, o le mautinoa lea o le Atua o lo'o filo ai i totonu o loimata o tiga (God is in the very cry itself). Ae o lagona ua faaosofia o Moltmann ua toe saga faamausaliina ai foi ma lo tatou faatuatua i le Atua e le fesiligia lava lona auai, ma faatonutonu folau pea i le malaga – o le faamoemoe e ola pea, ao tatou fetuleni pea ma luitau i le feau o le Talalelei.

O se tasi foi o mataupu e laualuga i le talitonuga o Moltmann, o le toe faamanatu lea mo se ua afaina i tiga ma mafatiaga, o le pule aoao a le Atua e faavae ma maua'a i le **alofa** (God's sovereignty rooted in love). Afai foi ua afaina i tiga, tau lava ina manatua e le tagata, o le alofa lea, o lo'o lotolotoi i totonu o mafatiaga. O le molimau maumaututu lava o le faamoemoe lea i le talitonuga o Moltmann, ma o se gaoioiga aupito sili lava lea ua faaalua ai le **alofa** pei ona taua i luga, o le satauro lea o Keriso. Fai mai a Moltmann, o le molimau a Mataio (27:46) ma Mareko (15:34) ina ua faaleoina e Iesu i luga o le satauro lagona o le fai Salamo (Salamo 22:1ff), e faigofie foi ona o malamalamaina i seisi itu, pe ana faapea e saunoa le Faaola, "Lo'u Atua e, lo'u Atua e, se a le mea ua e tuulafoai ai oe ia te oe?" (*"My God, my God, why have you abandoned yourself?"*). O lona uiga, o le tagi a le Atua, i le Atua – Ae o se tasi foi lea o mataupu e ogatotonu i le *Mataupu Silisili o le Faamoemoe* mo Moltmann, e ala i lona toe faamautuina o le auai o le Atua, i ona lava puapuaga, ma lona tuulafoaiina. O se lagona na fausia, ina ua talitonu Moltmann, o puapuaga ma mafatiaga e oo mai i le tagata, o lo'o lagonaina, ma o loo lotolotoi ai le Atua i taimi uma (*"God's presence even in God's own forsakenness, thus human suffering is then a "God-situation."*)

O le agaga foi lea fai mai Moltmann, o lo'o atagia i upu a le perofeta o Isaia (63:9) a o ia momoli se feau faamafanafana mo Israelu ma ia faapea ai, '*O latou puapuaga uma, na le fai ai o ia ma o latou fili..na ia siitia i latou, ma ave iai latou i aso uma anamua*' (In their distress..his presence saved hem..he lifted them up and carried them all the days of old). O le Atua o lo'o ia tausoa faatasi i o tatou tiga, ma o lea foi se faanaunautaiga ia Moltmann, ina ia tuueseina ai le manatu lea e masani ona faalogoina pea, o le Atua e na te le amanaiaina, pe lagonaina mai foi le luluti o tiga o le ola nei. I le ma lea, fai mai a Moltmann, o le faamoemoe foi lea na afua ai ona mitamita Paulo ma ia faapea ane ai i le ekalesia i Roma (5:5), '*and hope does not disappoint us, because God's love has been poured into our hearts...o le faamoemoe foi e le ma ai, aua ua faamaligi mai le alofa o le Atua i o tatou loto.*' O le faatuatua o le aposetolo o nuu ese, na ia talia ai puapuaga, ao tulimatai ma le mautinoa ona faamoemoega ua tuutasi i le Atua – o leisi lea lu'i mo Moltmann, ua taoto mai mo le tagata mafatia, e le gata i la le tino, ae faapea foi i le mafaufau, ma le agaga.

E manatu nisi o le au suesue o le Tusi Paia, o se tasi o vaega e tulaga ese ai lava le mataupu silisili a Moltmann, o lana mau lea ina ia aua lava nei avea le faamoemoe i le Malo o le Atua i le lumanai, e fai ma o tatou alofaga i faafitauli ma tiga o le ola nei (*do not hold out the hope for the future kingdom as an ideal to escape the grievances of life*). Peitai, e ao pea ona tatou talia ma olaina fita o le ola nei, faatasi ai ma lo tatou *tiga faatasi* ma e o puapuagatia, e ui lava ina e peiseai, tatou te faiaina i nisi o taimi, aemaise lava i tiga matuitui o le o'o mai o le oti.

E fausia foi e Moltmann le talitonuga tauave o le au faatuatua, e uiga i le taua ma le aoga o le faamoemoe ina ia toe saili pea i auala e toafimalie, ma toe sologa lelei ai le va nonofo o tagata (*hope of reconciliation*) aemaise lava mo i latou o lo'o taulamua i faiga e oia ai le filemu o se sosaiete. O lona uiga, o le faamagaloina o se amio ua le tonu po'o ua sasi foi le faatatau a se ua mafua ai ona tutupu ni fevesiaiga, e ao lava ona vaavaalua ma se galuega o le toe fuataina o le loto ma le mafaufau o sea tagata (po'o ia tagata), ina ia maua le atoatoa o sea "faaleleiga." O se faaleleiga e ao ona vaaia ma faatinoina i le va tagata, ae silisili ai i le va ma le Atua, o le faamoemoe lea mo Moltmann, ina ia maua le fesootaiga vavalalata lea ma le Atua, e le gata i le ola nei, ae faapea foi i le ola atali (*the eschatological hope*).³

O Mataio ma le Mataupu Silisili o le Faamoemoe

E pei lava ona taua i le faatomuaga o le pepa, e manatu nisi o le au suesue o le Feagaiga Fou, o tagata kerisiano o le lalolagi o le faievagelia, e mafuli i tagata Kerisiano Iutaia o e na ofoina mai lava e latou i latou lava [*voluntary association*]⁴, ma avea ai o se faalapotopotoga a e ua talitonu ma mulimuli i aoaoga a le Keriso. Fai mai le molimau a Richard S. Ascough, o le ekalesia a Matthew (Matthew's *ekklesia*), e mafai ona faamatalaina, o se potopotoga poo se faalapotopotoga a se au '*uso*' (a brotherhood association). Ona o lea le itu, o nisi o molimau ua faamauina e Mataio e faatatau i le soifuaga ma le galuega tala'i a Iesu, e peiseai e faatatau tonu lava i mea o loo tutupu ma vaaia i totonu o le siosiomaga lea a le au uso, le '*voluntary, brotherhood association*'.⁵ O nisi o faafitauli, e pei o le fevataua'i ma le fefulituaa'i o tagata, ma feeseeseaiga i le lotoifale, ona o le agaleaga ma le fia sili, lea e patino iai le Mataupu 18:1-20, ao taumafai atu le tusitala e toe faamaite uiga loloto o le loto faamagalalo ma le agamalu. E ogaoga foi sauaga a tagata Iutaia lava ia, e lamatia ai le soifua, faapea foi faamasinoga le amiotonu a le Malo o Roma, aemaise lava, o le toe fetuiai o tagata o le *ekklesia*, lea e agai iai le Mataupu 10: 17-25.

O le faamoemoe la mo le 'au uso', ao feagai ma luitau nei o le avea ma uluai kerisiano i le senituri muamua, o lea se taumafaiga o le a agai nei iai se manatu.

E manatu nisi o le au suesue o le Tusi Paia, e tulaga ese ai lava le vaai a Mataio, pe a faatusatusa i isi evagelia, ona o le faamatilatila e le tusitala o Mataio, o vaega o aoaoga a Iesu, e faatatau i le onosai ma le loto faamagalalo, ma le nofo fealofani o *uso*, e ala i faaleleiga (reconciliation).⁶ A maitau lelei iai, e peiseai o se manatu o loo tulituliloa e Mataio, ina ia laualluga i le 'au uso' lagona o le onosa'i, ona o tiga o le avea ma kerisiano, o le alofa, filemu ma le fealofani, ae le o le ita ma le tauimasui, e pei la o fuaitau nei:

³ Peter Althouse, "In Appreciation of Jürgen Moltmann: A Discussion of His Transformational Eschatology" in *PNEUMA: The Journal of the Society for Pentecostal Studies*, Volume 28, No. 1, Spring 2006 (ATLA Religion Database, 4/5/2010).

⁴ Richard S. Ascough, "Matthew and Community Formation" in David E. Aune, ed., *The Gospel of Matthew in Current Study* (Michigan: William B. Eerdmans Publishing Co, 2001), 96.

⁵ Ascough, 96 – 98.

⁶ William A. Bronn, "Forgiveness in 'My Brothers' of Matthew 28:10 and its Significance for the Matthean Climax (28:16-20), in *Biblical Theology Bulletin* Volume 40 Number 4, 207–214.

i. **Mataio 10:17 – 25**

O le toe molituina e nisi o le ‘au uso’ o isi i luma o le faamasinoga, faatasi ai ma le toe sauaina e Iutaia o o latou lava tagata i totonu o sunako, ma maumau ai le soifua; peitai mo le au ‘uso’, ia mau pea le to’ovae, ma ia taulai pea le faamoemoe i le Atua, aua e moni e faisotia le tino, ae le mafaia ona fasiotia le agaga

ii. **Mataio 5:21–24, 6:15, ma le 18:15–35**

O le loto faamagalo ina ia faamuamua pea; a ita foi i le ‘uso,’ e ao ona muai saili i se faaleleiga, ao lei ofoina atu se taulaga; ma ia aoai foi i le uso pe a agaleaga mai; a agaleaga mai foi le uso, ia faamagalo atu, ia le atu fitu, ae ia fitugafulu ni fitu!

iii. **Mataio 6:9**

o le tatalo a le Alii, o lo’o taua ai e Mataio le upu, ‘Lo matou Tama e o i le lagi (Our Father)’; o le naunautai i le loto gatasi, ae le o le manatu o le tagata ia te ia lava. (a silasila i le Mareko 11:25, o loo faapea mai, *A outou tutu ma tatalo, ai se mea e tiga ai i se tasi, ia outou faamagaloina*; e faapea foi le agaga o i le molimau a Mataio, e faatatau lava i le omai faatasi i luma o le Alii, i le loto e tasi)

iv. **Mataio 28:10..’ina o atu ia, lua te ta’u atu i o’u uso..**

O le vaega lenei o le molimau a Mataio, o loo faaalua manino ai lava le faamoemoe o le tusitala mo le ‘au uso,’ e ala i lona faatauaina o le agaga o le loto faamagalo. E iloa lelei le faatulagaina e Mataio o le faamoemoe lea, ina ua ia faaagaina le upu ‘*uso*’⁷ (brothers) ae le o le ‘*au so’o*’ (disciples) e pei ona masani ai. O le ‘*au uso*’ sa o latou talisua faatasi i le talisuga mulimuli (26:20), ma tautino e oti faatasi ma le Faaola (26:35), ae mulimuli ane, ua fa’ama’amulu, ona o le fefe i le oti (26:56). O le feiloaiga muamua la lenei ina ua mavae le Toetu, na manino ai lava le le toe amanaia e le Keriso Toetu o ni faaletonu o ona ‘uso’ ae ua aapa mai, ma saili mai e ala i le faaleleiga. E le o taua lava e Mataio i sana tala le upu ‘faamagalo’ ae ua lava lava le malosia o le upu ‘uso’ e ta aofai ai se faamoemoe ua taoto nei mo le au soo. Fai mai le mau a le alii o Ulrich Luz, e ui ina sosola le au soo ona o le le mautonu, ae ua lava lava le upu ‘uso’ e faailoa mai ai se lagona o i le Alii, e ui o so latou le faatuatua, ae le o faaleaogaina ai le faamaoni o le Alii.⁸ O lona uiga, o le feau lava o le faaleleiga le atoaga o le faamoemoe mo le au ‘uso’, ma ia onosaia foi le luluti o tiga o sauaga, ao lei aga atu e folafola le feau o le Talalelei. Ae o se toe faamanatu foi, ina ia o’o atu, ma papa’i atu le mafanafana o le Alii, i e o lo’o nofo le mautonu pea, ona o faafitauli e tutupu i le ola.

Upu Faaiu

O le olaga o le tagata faatuatua, e iai aso e toafimalie ai, e iai foi aso e asiasi mai ai tiga i le tagata. E ui e le o toe iai ni taua, ma e laitiiti foi ni atunuu o le lalolagi o lo’o saisaitia ma sauaina ai tagata kerisiano, ae ua aumai lava e nei ata manino o le lalolagi o Moltmann ma le sosaiete a Mataio ni feau aoga ma le taua mo i tatou. O le mafanafana i taimi o mafatiaga, ina ua mautinoa le auai ai o le Atua, atoa foi ma le manumalo a’ia’i o so’o se faamoemoe e lotolotoi ai le agaga o le Atua, o faamanatu taua ia. Ae o lea foi se agaga o lenei sailiiliga, ao tatou taumafai faatasi e tali atu i le tele o le mau faafitauli ua lofia ai le ekalesia, ae a le

⁷ ἀδελφός, adelphos: a brother, also a fellow believer, united to another by the bond of affection

⁸ Margaret Davies, “Matthew: Second Edition” in John Jarick, ed., *Matthew, Readings: A New Biblical Commentary* (Sheffield: Sheffield Phoenix Press, 2009), 234-235.

atunuu, ona o faafitauli e aliae mai. Afai e tautalagia, pe aisea, ua fevaevaea'i ai, ma fefulituaa'i ekalesia ma aulotu; afai foi e fesiligia, pe aisea ua agai ai tagata e saili se mapusaga i nisi o faalapopotoga tumaoti (ft., Faataua le Ola, Samoa Victim Support, ma isi), ae o lo'o alia'e pea le sauaina o tina ma fanau, ma le faatupulaia pea o le pule i le ola, ma le ola soonafai; afai foi e fesiligia, pe aisea ua uia ai ala o le faamasinoga i mataupu e faatatau i le Ekalesia, ae lei masani ai – ona iai lea o le fesili tele, o fea o taoto ai le *faamoemoe* o le feau o le Talalelei, ma le misiona a le Ekalesia, ua valaauina iai i taua? O le lui lea ua taoto mai, tatou te aleaga faatasi iai, aua lava se lumanai manuia o le Ekalesia, ae a le feau o le Faaolataga, ina ia tupu ma ola.

E faaii leni taumafaiga, i le molimau a se tasi o tusitala iloga o le mataupu silisili o Velli-Matti Kärkkäinen, i lona talitonuga, e fesootai lelei lava le faamoemoe, ma le *alofa*. E vaavaalua lava le faamoemoe ma le *alofa*, aua o le faamoemoe faale-tagata kerisiano, na te tuuina apaau e lele maua ai le *alofa*; “*Christian hope gives wings to love.*”⁹ O le alofa na te faamaite mea lelei e atinae ai o tatou aiga, nuu, ekalesia ma aulotu, ma alofa ai le tagata i lona tuaoi, ma le Atua.

O upu faaii a le alii o Moltmann e faapea:

*‘hope is the expectation of those things which faith has believed to have been truly promised by God; faith is the foundation upon which hope rests, hope nourishes and sustains faith. Without hope, faith falls to pieces, and it is through faith that man finds the path of true life, but it is only hope that keeps him on that path. Thus it is that faith in Christ which gives hope its assurance. Thus it is, that hope gives faith in Christ its breadth and leads it into life.’*¹⁰

Ia manuia tele le Mafutaga Faaufouina o leni tausaga 2016!

Ma lo’u faaaloalo lava

Olive Tuipoloa Samuelu
Malua 2016

O Nisi o Tusiga sa Faaaogaina

⁹ Veli-Matti Kärkkäinen, “March Forward to Hope”: Yonggi Cho’s Pentecostal Theology of Hope” in *PNEUMA: The Journal of the Society for Pentecostal Studies*, Volume 28, No. 2, Fall 2006 (ATLA Religion Database 25/7/2011).

¹⁰ Jurgen Moltmann, *A Theology of Hope: On the Ground and the Implications of a Christian Eschatology* (Michigan: SCM Press Ltd, 1965), 20.

- Althouse, Peter. "In Appreciation of Jürgen Moltmann: A Discussion of His Transformational Eschatology." in *PNEUMA: The Journal of the Society for Pentecostal Studies*, Volume 28, No. 1, Spring 2006. (ATLA Religion Database, 4/5/2010).
- Ascough, S Richard. "Matthew and Community Formation" in David E. Aune, ed., *The Gospel of Matthew in Current Study*. Michigan: William B. Eerdmans Publishing Company. 2001.
- Bronn, A. William, "Forgiveness in 'My Brothers' of Matthew 28:10 and its Significance for the Matthean Climax (28:16-20), in *Biblical Theology Bulletin* Volume 40 Number 4, 207–214.
- Davies, Margaret. "Matthew: Second Edition" in John Jarick, ed., *Matthew Readings: A New Biblical Commentary*. Sheffield: Sheffield Phoenix Press, 2009.
- H Stassen, Glen. "The Fourteen Triads of the Sermon on the Mount: Matthew 5: 21- 7: 12" in *JBL* 122/2 (2003), 267 – 308 (ATLA Religion Database, 10/3/2010).
- Kärkkäinen Veli-Matti. "March Forward to Hope": Yonggi Cho's Pentecostal Theology of Hope" in *PNEUMA: The Journal of the Society for Pentecostal Studies*, Volume 28, No. 2, Fall 2006. (ATLA Religion Database 25/7/2010).
- Kirk, Alan. "Love Your Enemies,:" The Golden Rule and Ancient Reciprocity" in *JBL* 122/4 (2003), 667 – 686 (ATLA Religion Database, 21/7/2009).
- Moltmann, Jurgen. *A Theology of Hope: On the Ground and the Implications of a Christian Eschatology*. Michigan: SCM Press Ltd. 1965.
- _____, *The Trinity and the Kingdom: The Doctrine of God*. Minneapolis: Fortress Press. 1993.